

四庫全書

集部

欽定四庫全書

集部
陳白沙集卷一

詳校官庶吉士臣陳若霖

中書臣劉源溥覆勘

總校官檢討臣何思鈞

校對官中書臣高中

謄錄監生臣沈錫壽

欽定四庫全書

集部六

陳白沙集

別集類五
明

提要

臣等謹案白沙集九卷明陳獻章撰獻章字公甫新會人正統丁卯舉人以薦授翰林院檢討追諡文恭從祀孔廟事蹟具明史儒林傳其集為門人湛若水校定萬歷間何熊祥重刊之凡文四卷詩五卷行狀誌表附于後

獻章為學以靜為主其教學者但令端坐澄
心于靜中養出端倪弟子相傳為白沙學派
與諸家互有同異所為文章論者頗以質直
少之其詩亦自擊壤集中來另為一格至今
毀譽各半然平情而論譽者過情毀者亦多
失實大抵皆門戶相軋之見惟王世貞謂其
詩不入法文不入體而其妙處有超出法與
體之外者可謂兼盡其短長矣近人又有輯

獻章論學之語為白沙語錄行世者核其所
載乃即于此集中摘出排比而成並非別有
一書也乾隆四十六年五月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

陳白沙集卷一

明 陳獻章 撰

奏疏二首

乞終養疏

臣原籍廣東廣州府新會縣人由本縣儒學生員應正
統十二年鄉試中式正統十三年會試禮部中副榜告
入國子監讀書景泰二年會試下第成化二年本監撥
送吏部文選清吏司歷事成化五年復會試下第告回

原籍累染虛弱自汗等疾又有老母朝夕侍養不能赴部聽選成化十五年以來廣東左布政使彭韶欽差總督兩廣軍務兼理巡撫右都御史朱英前後具本薦臣堪充任使吏部移文廣東布政司等衙門趣令起程臣以舊疾未平母年加老未能輒行府縣官吏承行文書日夕催逼不免強起就道而沿途病發隨地問醫扶衰補羸僅不大憊於成化十九年三月三十日到京朝見赴部乃以久勞道路舊疾復作延至月餘於五月二十五

日蒙吏部題奉聖旨恁部裏還考試了量擬職事來說
欽此欽遵臣時方在牀褥聞命媿悚未能就試即令姪
男陳景星赴通政使司告轉行本部暫令調治再歷晦
朔心不自安七月十六日扶病赴部聽試而筋力朽弱
立步艱難自揣虛薄未堪筆硯因續具狀再延旬日日
復一日病勢轉增耳鳴痰壅面黃頭暈視昔所染無慮
數倍衆目所覩不敢自誣又於八月二十二日得男陳
景易書報臣母別臣以來憂念成疾寒熱迭作痰氣交攻

待臣南歸以日為歲臣病中得此魂神飛喪仰思君命
俯念親情展轉鬱結終夜不寐臣之愚迷實不知所以
自處也臣自幼讀書雖不甚解然於君臣之義知之久
矣伏惟我國家教育生成之恩陛下甄陶收采不遺卑
賤之德至深至厚於此而不速就以圖報稱於萬一非
其情有甚不得已者孰敢驚虛名飾虛讓趨進卻於
日月之下以冒雷霆之威哉臣所以一領鄉書三試禮
部承部檄而就道聞君命而驚心者正以此也緣臣父

陳琛年二十七而棄養臣母二十四而寡居臣遺腹之
子也方臣幼時無歲不病至於九齡以乳代哺非母之
仁臣委於溝壑久矣臣生五十六年臣母七十有九視
臣之衰如在襁褓天下母子之愛雖一宜未有如臣母
憂臣之至念臣之深者也臣於母恩無以為報而臣母
以守節應例為有司所白已蒙聖恩表厥宅里是臣以
母氏之故荷陛下之深恩厚德又出於尋常萬萬也顧
臣以貧賤早寡俯仰無聊殷憂成疾老而彌劇使臣遠

客異鄉臣母之憂臣日甚愈憂愈病愈病愈憂憂病相
仍理難長久臣又以病軀憂老母年未暮而氣則衰心
有為而力不逮雖欲効分寸於旦夕豈復有所惜哉臣
所以日夜憂憊欲處而未能者又以此也夫內無攻心
之疾則外不見從事之難上有至仁之君則下必多曲
成之士惟陛下以大孝化天下以至誠體萬物海宇之
內無匹夫匹婦不獲其所者則臣之微亦豈敢終有所
避而不自盡哉伏望聖明察臣初年愿任之心憫臣久

病思親不能自己之念乞勅吏部放臣暫歸田里日就醫藥奉侍老母以窮餘年俟母養獲終臣病全愈仍前赴部以聽侍用則臣母子未死之年皆陛下所賜臣感恩益深圖報益切雖死於道路無所復辭矣臣干冒天威無任皇恐戰栗之至

謝恩疏

臣於成化十九年八月二十八日具本陳情乞還養母兼理舊疾九月初一日欽奉聖旨陳獻章既該巡撫等

官薦他學行老成可用今懇切求回養母吏部還查聽
選監生願告回家的例來說欽此及吏部查例覆奏於
本月初四日欽奉聖旨陳獻章既係巡撫等官薦他今
自陳有疾乞回終養與做翰林院檢討去親終疾愈仍
來供職欽此伏念臣本菲才誤蒙薦舉又以老母在念
沈疴在躬未得以仰承試用陛下憫其愚誠不加誅責
使少寬旦夕之假已云幸矣而又慰之以溫言寵之以
清秩使遂其欲去而勉其復來此誠天地之量日月之

明雨露之澤出於尋常條格之外者臣雖至愚亦知銜
負恩德圖報稱於親終疾愈之日不敢負朝廷待士之盛
意不敢違臣子効用之初心也但身在牀褥實難動履
輒欲具本稱謝以不親拜舞益不自安即令姪男陳景
星具狀鴻臚寺告欲俟筋力稍紓尚當勉強赴闕庶幾
少伸報謝之萬一而又為風寒所中肢節沈痛卧不能
興臣竊復自念舊疾方殷新病復繼恐非旬月可愈不
惟有稽入謝之期抑且不能亟副歸養之詔心未酬而

罪愈甚矣臣瞻望朝廷離違在邇雖圖報有日而遲速未占俯仰媿怍無任感激戀慕之至

序

認真子詩集序

詩之工詩之衰也言心之聲也形交乎物動乎中喜怒生焉於是乎形之聲或疾或徐或洪或微或為雲飛或為川馳聲之不一情之變也率吾情盎然出之無適不可有意乎人之贊毀則子虛長楊飾巧夸富媚人耳目

若俳優然非詩之教也甚矣詩之難言也李伯藥見王
通而論詩上陳應劉下述沈謝四聲八病剛柔清濁靡
不畢究而王通不答薛收曰吾嘗聞夫子之論詩矣上
明三綱下達五常於是徵存亡辨得失小人歌之以貢
其俗君子賦之以見其志聖人采之以觀其變今子之
言詩是夫子之所痛也南朝姑置勿論自唐以下幾千
年于茲唐莫若李杜宋莫若黃陳其餘作者固多率不
是過烏虜工則工矣其皆三百篇之遺意歟率吾情益

然出之不以贊毀歟發乎天和不求合於世歟明三綱
達五常徵存亡辨得失不為河汾子所痛者殆希矣故
曰詩之工詩之衰夫道以天為至言詣乎天曰至言人
詣乎天曰至人必有至人能立至言堯舜周孔至矣下
此其顏孟大儒歟宋儒之大者曰周曰程曰張曰朱其
言具存其發之而為詩亦多矣世之能詩者近則黃陳
遠則李杜未聞舍彼而取此也學者非歟將其所謂大
儒者工於道不工於詩歟將未至於詣乎天其言固有

不至歟將其所謂聲口勿類歟言而至者固不必其類
於世或者又謂詩有別材非闕書也詩有別趣非闕理
也則古之可與言詩者果誰歟夫詩小用之則小大用
之則大可以動天地可以感鬼神可以和上下可以格
鳥獸四時行焉百物生焉皇王帝霸之褒貶雪月風花
之品題一而已矣小技云乎哉都憲朱公以其所為詩
編次成帙題曰認真子集授簡於白沙陳獻章曰為我
序之公昔語我於蒼梧曰詩非吾所長公豪於辭矣而

未始以為足認真子名集公意有所屬顧覽者未必知而吾以是覘公之晚節也詩雖工不足以盡詩而況於盡人乎謂吾不能於詩而好為大言不知言者也公名英字時傑郴陽人由進士歷官中外節用而愛人

奉餞方伯張公詩序

昔魏野送寇忠愍之詩云好去上天辭富貴歸來平地作神仙當是時寇公自永興召入其志方銳於事為野遽止之故寇公不悅後來通州始書此詩於壁間朝夕

諷詠之論者以是善野之言而以寇公之始終為可議
夫君子出處去就之義固未可盡責之寇公輩而山人
處士例以不出為高故其所責望於人亦止以輕富貴
為第一等事則野之於寇公其相與之言如此亦宜方
伯張公不以僕愚往往欲置之門下近者疊紙責以贈
言僕何敢為佞誠慕古人出處之大不敢徇一己之私
主一偏之見以必人之從我而忘天下故區區之辭惟
以已與公進退並言之而不敢效尤於野之必其義可

否公請自擇胡文定公平生出處未嘗謀於朋友如人
飲水冷暖自知惟公裁焉其辭曰去夢勞英爽投書阻
歲年壯遊眇車蓋虛卧老江烟公德清南服帝心簡時
賢神仙休囑付卿相待回旋

東曉序

居之有名惡乎始君子之居也興於斯息於斯目之所視
心之所隨苟無所事乎畏則怠而入於忘其主於畏乎
何氏子隱南海之濱更名潛榜其居曰東曉蓋亦以其

識見之超卓能及於微遠如陽氣始舒昭晰無間故以其象諭之云耳時乎見則見矣宜潛而見過也則有畏潛惡乎畏而取於是故直以為喻已然予謂潛之畏不終無也暘谷始旦萬物畢見而居於鄙屋之下亭午不知也忽然夜半起振衣於四千丈羅浮之岡引盼於扶木之區赤光在海底皎如晝日仰見羣星不知其為夜半此無他有蔽則闇無蔽則明所處之地不同所遇隨以變况人易於蔽者乎耳之蔽聲目之蔽色蔽口鼻以

臭味蔽四肢以安佚一掬之力不勝羣蔽則其去禽獸
不遠矣於此得不甚恐而畏乎知其蔽而去之人欲日
消天理日明羅浮之於扶木也溺於蔽而不勝人欲日
熾天理日晦蔀屋之於亭午也二者之機間不容髮在
乎思不思畏不畏之間耳潛隱者也理亂黜陟刀鋸非
所畏尚亦有畏於斯乎因其乞言序以勗之

李文溪文集序

予嘗語李德孚曰士從事於學功深力到華落實存乃

浩然自得則不知天地之為大死生之為變而況於富貴貧賤功利得喪詘信予奪之間哉今觀其先世文溪先生遺藁初涉其流渺茫汪洋若江河之奔駛而又好為生語險怪百出讀者往往驚絕至或不能以句以謂文溪直文耳徐考其實則見其重內輕外難進而易退蹈義如弗及畏利若懦夫卓乎有以自立不以物喜不以己悲益亦庶幾乎吾所謂浩然而自得者矣然後置書以歎曰嗟乎此文溪所以為文也亟讀而亟思之執

卷務盡乃至目倦神疲欠伸欲起輒回顧屑屑焉不忍舍也夫因言以求其心攷跡以觀其用故人之深淺卑見愚不敢自謂有得於文溪之蘊顧平首所以告德孚者乃區區願學而未能忽焉親諸簡冊之中麤若冥會雖不盡解其說要其歸與此異者蓋寡矣則以之而嗟歎慕悅尚奚疑哉傳曰生乎百世之上百世之下聞者莫不興起此之謂也德孚念先緒之落落遺稿僅存復多訛闕乃深自懼恐悉訪諸族之人得舊所刊本與所謄

本叅校闕其所疑刻之家塾命盾子昭董其事而俾予
為序之於乎自予為免時而獨恨未識其心胸氣象為
何如此歲京師獲交德孚亦嘗一閱其世譜今幸真目
於先生之文而知富貴果不足慕貧賤果不足羞功利
得喪屈信予奪一切果不足為累天地之為大死生之
為變自得者果不可得知而奮乎百世之上興起百世
之下孟軻氏果不予誣其所恃者蓋有在也故士必志
道然後足以語此德孚好學老當益壯昭也尚亦有激

於予之斯言也乎

澹齋先生挽詩序

昔人求哀辭於林希希謝之書有曰君子無苟於人患其非情也夫感而哀之所謂情也情之發而為辭辭之所不能已者凡以哀為之也苟無其哀矣則又惡以辭為哉此之謂不苟於人也余頃居京師二年間從貴公卿游入其室見新故卷冊滿案其端皆書謁者之辭就而閱之凡以其親故求挽詩者十恒八九而莫不與也

一或拒之則艷然矣懼而艷然而且為怨也而強與之
豈情也哉噫習俗之移人一至於此亦可歎也天下之
偽其自茲可憂矣澹齋先生姓某氏名某秣坡黎先生
門人也吾鄉稱先達以文行教後進百餘年間黎秣坡
一人而已秣坡與余連里第余之生也後不及侍其門
弱冠與澹齋之子益游始拜澹齋誨余以秣坡事縷縷
此豈一日忘其師者耶當是時秣坡之門存者不少獨
澹齋以其學教授於羅山之下子弟有所矜式焉夫不

背其師於既死而傳其學於來世信也愛其子以及其友仁也益之子執饋於我雲也今為梁氏甥戚也藉是三者死也能無哀乎哀而後為之詩詩之發率情為之是亦不可苟也已不可偽也已

綠園伍氏族譜序

伍氏系出汴梁先世有仕宋為嶺南第十三將卒于官遺其二子新會遂有綠園之伍曰朝佐曰朝愷今為綠園始遷之祖而岷又始遷之祖所自出所謂第十三將

者是也。氓以上世次莫詳，今斷自可知，以氓為第一世。自氓而下，或隱或仕，垂三四百年，邑之稱望族曰衣冠之美，無替厥先術業之隆。有光厥後者，得伍氏焉。吾友光宇自其先大父某始徙居外海之南山山之坡院，有石延袤丈餘，下可容一榻。光宇築為室，石旁樹松竹，往往造其間，危坐收斂，為持敬之學。又於白沙築小室三間，命曰尋樂，以為問業之所。至則商論彌月而後返。用心良苦，時人無有能窺其際者。惟寶安林光與余知之。

余交最久光纔一再見退謂其弟琰曰伍光字君子人也素有肺疾然喜聞議論之益當其呻吟疾苦之時遇有得輒若亡去辛卯首夏疾大作中益以他恙遂不可支是秋九月余往視之坐甫定便語云還我族譜序吾無憾焉耳退見其季父絢洎伯兄裕咸申之曰絢等殆未有請也惟先生之於雲也實望之寧獨愛一言且使聞之病亦尋起嗚呼若光字者困而益堅老而愈壯危至而知惕樂矣而不淫可謂篤信有守者矣其於伍氏

所謂無替而有光者其在斯人歟其在斯人歟

夕惕齋詩集後序

受樸於天弗鑿以人稟和於生弗淫以習故七情之發
發而為詩雖匹夫匹婦胸中自有全經此風雅之淵源
也而詩家者流矜奇眩能迷失本真乃至旬鍛月煉以
求知於世尚可謂之詩乎晉魏以降古詩變為近體作
者莫盛於唐然已恨其拘聲律工對偶窮年卒歲為江
山草木雲烟魚鳥粉飾文豹益亦無補於世焉若李杜

者雄峙其間號稱大家然語其至則未也儒先君子類以小技目之然非詩之病也彼用之而小此用之而大存乎人天道不言四時行百物生焉往而非詩之妙用會而通之一真自如故能樞機造化開闔萬象不離乎人倫日用而見鳶飛魚躍之機若是者可以輔相皇極可以左右六經而教無窮小技云乎哉今之名能詩者如吹竹彈絲敲金擊石調其宮商高者為霓裳羽衣白雪陽春稱寡和雖非韶護之正亦足動人之聽聞是亦

詩也吾敢置不足於人哉少叅任君涖吾省間過白沙
攜其先公詩集求一言於卷末予故以詩道略陳之若
夫先公吟詠之情具在集中覽者當自得云

送張進士廷實還京序

鄉後進吾與之游者五羊張詡廷實始舉進士觀政吏
部稽勲尋以疾請歸五羊五羊大省地廷實所居戶外
如市漠然莫知也自始歸至今六年間歲一至白沙吾
與之語終日而忘疲城中人非造廷實家不得見廷實

而疑其簡實不然也蓋廷實之學以自然為宗以忘已為大以無欲為至即心觀妙以揆聖人之用其觀於天地日月晦明山川流峙四時所以運行萬物所以化生無非在我之極而思握其樞機端其銜綏行乎日用事物之中以與之無窮然則廷實固有甚異於人也非簡於人以為異也若廷實清虛高邁不苟同於世也又何憂其不能審於仕止進退語默之槩乎道也茲當聖天子登寶位之明年思得天下之賢而用之而廷實之病

適愈太守公命之仕廷實不得以未信辭於家庭於是
卜日告行於白沙留二十餘日去歲之冬李世卿別予
還嘉魚贈以古詩十三首其卒章云上上崑崙峰諸山
高幾重望望滄溟波百川大幾何卑高入揣料小大窮
多少不如兩置之直於了處了世卿豪於文者也予猶
望其深於道以為之本廷實至京師見世卿重為我告
之廷實所以自期廷實其自信自養以達諸用他人莫
能與也

西關丁氏族譜序

邑長丁彥誠嘗欲修正其世譜而患文獻之無足徵以問於予告之曰務遠之詳孰信好大之同自誣譜吾所知世其賴之乃取其家舊所藏宗系圖上下亘數百年著而為世者二十有一朱墨漫滅之餘存者或僅識其行第而已別出近譜一巨編世倍於圖而辭蕪陋亦甚焉丁氏之居西關者每歲以社日有事於先祖長老主祭者稱述先世以詔其族之人其所稱顯而遠者丹陽

司馬司馬以降曰一司徒六節度

闕

僕射十光祿云

司徒於今無所考圖之世昉于此別譜乃增自其上九世世有顯者焉其他若衆支之所屬世以增損先後牴牾於圖者十九二者之間孰得孰失作譜者要自知之耳丁氏始遷寧都之園村子孫散居市落與他方者日遠日疎莫能統一各以其派為譜西關之譜以為司馬首世而以始遷西關之祖大郎首派遠近詳略大小同異本於圖君一無所改於其舊屬某序之君以成化戊

戊進士宰縣一年能使強者畏弱者懷盡毀邑中之淫
祀而以禮教禁民之邪于茲六年矣然猶未能盡得於
人則亦以其方枘而圓鑿者有以致之焉今是譜也亦
主於實而已予故為辨而序之予曩讀蘇子瞻剛說想
見其人青天白日其立於朝也如千仞之壁可望而不
可即者孫先生介夫也於君為鄉先進君告予以三七年
不決之疑曰西闕之六世無子後以孫氏是為七二居
士實介夫之子事載居士墓銘今已亡矣蓋其自幼時

聞於長者如此果爾介夫君之所自出豈徒曰鄉之人哉并識于此

湯氏族譜序

家之譜國之史也本始必正遠邇必明同異必審卑而不援高微而不附彰不以貴易親不以文覆德良譜也莫不有家也小大異焉莫不有世也升降異焉自吾之世推而上之缺其不可知者存其可知者良譜也世假譜以存者也譜存之家是名世家修譜者不知世之重

也援馬以為重無實而借之詞吾不欲觀也湯氏邑之著姓也自言先汴人隨宋南渡居嶺南南雄世遠失傳今以始自南雄遷古岡曰統者為一世祖統以上無考譜亡于元季之亂續之者唐府伴讀八世孫有容也退菴鄧先生序之正統己巳之秋黃賊起南海一郡騷然賊南攻湯氏之婦馬氏奮謂其夫溥英曰賊且至矣他物易得耳譜亡文獻無徵於是馬氏手挈是編走邑城西北貴竒坑出入水火顛沛極矣譜卒賴以全湯氏之

先以儒起家世有顯人序稱伴讀君之賢有自今馬氏
又賢也在宋欽州守馬持國賢而有名馬氏幾世祖也
其賢蓋亦有自云庠子紹端念母氏之賢勞將托以告
後之子孫俾咸念之徵予序予惟世家之譜可觀不援
不附如湯氏亦良譜也內則賢婦女外則賢丈夫相與
修緝維持既亡而復存湯之子孫念之亦允蹈之國史
記事略與家譜同史主勸懲譜勸而不懲不脩其世而
以譜重君子不重也卒亦不勸而已矣存世者譜也存

而重之譜乎世之重以德譜之重以言德與言孰重重
世乎重譜乎在湯氏

送李世卿還嘉魚序

弘治元年戊申夏四月湖廣嘉魚李承箕世卿自其鄉
裹糧南望大庾嶺沿途歌吟入南海訪予白沙一見語
合意先是五六年予會都憲公之子承恩于北京承恩
世卿從弟也示予以世卿之文出入經史跌宕縱橫筆
端袞袞不竭來數千言沛然出之若不為勢利所拘者

予時未識世卿而知世卿抱負有大於人既不忘於心亦時於詩焉發之或聞論當世士有文章必問曰如李世卿否然又意世卿少年凌邁高遠則有之優游自足無外慕嗒乎若忘在身忘身在事忘事在家忘家在天下忘天下世卿未必能與我合孰知世卿有意於來耶自首夏至白沙至今凡七越月中間受長官聘修邑志于大雲山五十餘日餘皆在白沙朝夕與論名理凡天地耳目所聞見古今上下載籍所存無所不語所未語

者此心通塞往來之機生生化化之妙非見聞所及將以待世卿深思而自得之非敢有愛於言也時時呼酒與世卿投壺共飲必期於醉醉則賦詩或世卿唱予和之或予唱而世卿和之積凡百餘篇其言皆本於性情之真非有意於世俗之贊毀至是世卿以太夫人在堂辭去欲留不可為古詩十三首別之諸友相繼有言世卿歸以所聞於予者質諸伯氏茂卿登大崖山吟弄赤壁之風月予所未言者世卿終當自得之世卿之或出

或處顯晦用舍則繫於所遇非予所能知也予老且病
行將采藥於羅浮四百三十二峯以畢吾願世卿能復
索我於飛雲之上否耶序以送之

望雲圖詩序

意所嚮往處非乘雲御風身不可得而至窮之乎山川
委之乎官守曠之乎歲月當食食忘當寢寢廢一有感
乎外而動乎中終日視而目不瞬以言乎化外不化而
內化以言乎情則哀而不傷至矣乎非子之於親則臣

之於君過而不過其狄梁公歟梁公仕唐在武后朝以一身繫唐宗社之重扶陽抑陰光復唐祚事載簡冊昭若日星夫梁公可謂有大功於唐矣賢者識其心自望雲一念中來故曰求忠臣必於孝子之門今王公少孤事母夫人以孝聞稱於藩臬諸公者無異辭公山西人也奉命來南海幾年念太夫人春秋高不得左右朝夕侍以為憂與人言輒流涕嗚咽而不自勝先公之逝公方委齒已能慟絕復蘇蓋公之孝自天性非由勉慕乎

外於是諸公命工繪望雲思親圖以表之復相與賦詩
道其事俾古罔病夫陳某俾序之頃者公乘廣海之舟
揭來新會吏民親公如親賢大夫忘乎公之為貴也時
情俗態好佞諛而樂承奉皆是也公一濯之清風而民
稱其不擾夫以今日之所聞徵諸古若梁公之事然後
識其中之所存苟無是心有文章足以收譽於衆口有
功業足以耀榮於一時有名節足以警動乎流俗皆偽
而已豈能久而不變哉夫孝百行之源也通於神光明

於四海堯舜大聖也孟子稱之曰孝弟而已矣故君子
莫大乎愛親嘗取李令伯陳情表讀之有不感咽流涕
廢書以歎者乎烏虜令伯之表太行之雲也斯圖也若
之何使王公見之慰其憂增其憂殆非所以處王公也
雖然君與親一也在親為親在君為君世寧有篤於親
而遺其君者乎圖而賦之以表公之孝以勸公之忠而
又以公之能媿人之不能振頽風扶世教固有位者之
事諸公豈無意乎覽者當自得

贈李劉二生使還江右詩序

匡廬白鹿之故壤也宋考亭朱晦翁一嘗作新之後遂
無聞焉我朝文教誕敷鄉先輩程公守南康日始圖創
復舊觀潮陽李先生繼之白鹿書院之名復聞於天下
成化十七年江西按察使恥菴陳先生乃謀於提督學
校憲副鍾公僉事冷菴陳公大叅祁公慨然以作新斯
文為己任謂予於考亭之學亦私淑諸人者宜領教事
乃具書幣告于巡鎮遣二生李士達劉希孟如白沙以

請同時司藩臬諸賢咸與聞之外則東白張先生廣東大方伯彭公按察使閔公吉水表德純各以書遺子雲輝日映交迸衡宇二生以諸公之命命子子覽幣而驚置書而走走且告曰二生莫誤諸公欲興白鹿之教復考亭之舊必求能為考亭之學者夫然後可以稱諸公之任使乃下謀於予是何異借聽於聾求視於盲也予聞之君子之使人也由其誠不强其所不能諸公即居予於廬山予所能也居廬山以奉諸公之教非予所能

也二生其審諸於是邑中聞有諸侯之使自邑令佐以下至士庶耆老源源而來靡不觀感李生丰姿秀發言論是非不苟雷同劉生貌恭而言慎確有據守俱稱為東白門人也予甚愛之留且彌月矣二生以諸公之命久不復辭去予既返諸公幣復為詩別之所以致區區於二生而申景仰於廬山也是日憲副陶公過白沙邑長丁侯鄉諸士友各賦詩以贈帙成俾予序之

味月亭序

成化丙午春正月五羊何子有載酒過白沙對月共
飲延緣數夕告子曩夢遊仙甚適扁所居第為味月亭
識夢境也願乞一言以歸子口占一絕句云騎羊仙客
去仙城風韻千年落杳冥羅浮道士來何處笑倒君家
味月亭戲謂子有曰君不知羅浮道士耶嘗俛仰子之
亭矣因撫掌笑前此五年子被徵過郡通名子有之廬
道士即子蓋寓意耳

贈容一之歸番禺序

容生卓錫無地從予游者十有一載未嘗對人作皺者
狀入京師見聲利烜赫輒不樂語人曰古之仕者將以
行其志耳徒食人祿而不知恥雖吾不能以一日居生
之志可謂篤矣顧以予之疎繆不能輔其為仁是生雖
有美質而其學未底于成由吾之虛名誤之也雖然生
之志豈易為哉聖賢之言具在方冊生取而讀之師其
可者改其不可者直截勇往日進不已古人不難到也
但恐游心太高著蹟太奇將來成就結裏處既非庸常

意料所及而予素蹇鈍胡能追攀逸駕仰視九霄之上何許茫茫生方銳意以求自得亦將不屑就予又安知足履平地者果為何如也千里之行始乎跬步生慎由之陳先生習忘久矣生歸見毅卿其亦以是語之

道學傳序

自炎漢迄今文字記錄著述之繁積數百千年於天下至於汗牛充棟猶未已也許文正語人曰也須焚書一遭此暴秦之迹文正不諱言之果何謂哉廣東左方伯

陳公取元所修宋史列傳中道學一編鏤板與同志者
共之宋史之行於天下有全書矣公復於此留意焉噫
我知之矣孔子曰十室之邑必有忠信如丘者焉不如
丘之好學也後世由聖門以學者衆矣語忠信如聖人
鮮能之何其與夫子之言異也夫子之學非後世人所
謂學後之學者記誦而已耳詞章而已耳天之所以與
我者固茫然莫知也夫何故載籍多而功不專耳目亂
而知不明宜君子之憂之也是故秦火可罪也君子不

諱非與秦也蓋有不得已焉夫子沒微言絕更千五百
年濂洛諸儒繼起得不傳之學於遺經更相講習而傳
之載於此編者備矣雖與天壤共弊可也抑吾聞之六
經夫子之書也學者徒誦其言而忘味六經一糟粕耳
猶未免於玩物喪志今是編也采諸儒行事之迹與其
論著之言學者苟不但求之書而求諸吾心察於動靜
有無之機致養其在我者而勿以聞見亂之去耳目支
離之用全虛圓不測之神一開卷盡得之矣非得之書

也得自我者也蓋以我而觀書隨處得益以書博我則
釋卷而茫然此野人所欲獻於公與四方同志者之芹
曝也承公命為序故及之公名選字士賢浙之臨海人
先公勿齋先生宰新城遺愛在民公稱其家學云

襍詩序

余自成化辛卯秋九月以來絕不作詩值興動輒過之
至今年夏四月余病小愈扶杖出門俯仰上下欣慨于
心師友代凋知己悠邈殆亦不可為懷反乎中堂童子

絃歌蹶然厥中情危境逼因緣成聲積旬所為凡得詩若干此外又有聞蛙聞杜鵑示跛奴詰李翁奴送西賓筆等通若干詩微覺曠日既反于故戒晦日取閱之皆誠意所發辭不虛假序而藏之用示兒子

送李山人詩序

成化辛卯春永豐人李立武挾風水之術過白沙訪予一日以其術相地於蓬萊館指其上土渦謂余曰仰天湖也余不能識其然否西北歷崑崙之麓出入十二那

環以青山蒙以白雲余於是俯仰樂甚李君既四顧無
所得復歎仰天湖之勝以為奇絕余於李君蓋各適其
適也作詩以貽之

送容一之如永豐詩序

縣主丁侯景仰一峯羅先生於既歿乃以學生容貫充
弔祭使如永豐而歸其賻于先生之子清極貫云當自
永豐東走金陵謁木齋莊先生於江浦然後歸一念懷
賢無間存歿可壯也歌以送之詞曰還從江北話江西

金定曰八卷一
卷一
謁墓人來見木齋長江亦是東湖水何處吟風弄月臺
今朝何事又離羣南北東西一片雲如此行藏都未定
老夫扶病欲隨君

東圃詩序

南海范規從予游嘗聞規之父東圃翁朴茂於人無怨
惡早歲出入江湖既倦而歸圃於西江之潯花山之陰
因寄號曰東圃東圃方十畝治其中架草屋三間傍植
花卉名木蔬果翁寄傲于茲或倚丈人蓀或抱漢陰甕

興至便投竿弄水擊壤而歌四時之花丹者摧白者吐
或飲露而食英或尋芳而索笑科頭箕踞榭陰竹影之
下徜徉獨酌目諸孫上樹取果實嬉戲笑語以為適醉
則曲肱而卧藉之以綠草灑之以清風寤寐所為不離
乎山雲水月大抵皆可樂之事也規別白沙去遊曹溪
洞不相見數年矣一日復來與規語如聞陳子昂李太
白賦感遇詩一喜一愕規亦竒矣哉比歸以東園詩為
請且曰無以娛親故也予樂聞東園翁為人而憐規之

志不可違也賦排律十韻以贈之東圃名真字則未聞也詩曰一老昏江卧瀕江一圃開林春烟淡泊地暝月徘徊盡日高茆宇殘年寄酒杯山蹊人不到庭竹鳳飛來靜得丘園樂清無市井埃雲封朝几白風入夜絃哀細雨攜鉏去輕筇看藥回江山吾晚暮梨栗爾嬰孩天上羣龍遠花前獨鶴陪誰為求仲侶心蹟總悠哉

記

韶州風采樓記

宋仁宗朝除四諫官其一人忠襄余公也蔡君謨詩云
必有謀猷裨帝右更教風采動朝端弘治十年春韶守
錢君鏞始作風采樓與張文獻風度樓相望忠襄之十
八世孫英走白沙謁文以表之夫自開闢達唐自唐達
宋至于今不知其幾千萬年吾瞻於前泰山北斗曲江
公一人而已耳吾瞻於後泰山北斗公與菊坡公二人
而已耳噫士生於嶺表歷茲年代之久而何其寥寥也
則公之風采在人爭先睹之為快如鳳凰芝草不恒有

於世也可知矣如公之才得行公之志所謂障百川而東之回狂瀾於既倒公固有之公有益於人國也大矣雖然一諫官豈能盡公哉顏淵問為邦孔子斟酌四代禮樂告之顏淵處士也何與斯理耶居陋巷以致其誠飲一瓢以求其志不遷不貳以進於聖人用則行舍則藏夫子作春秋之旨不明於後世矣後之求聖人者顏子其的乎時乎顯則顯矣時乎晦則晦矣語默出處惟時豈苟哉英乎勉諸母曰忠襄可為也聖人不可為也

古蒙州學記

立山復州治之幾年今雲南左布政使樂安謝公綬始領右方伯之命來廣西其民舉欣欣然喜而相告曰公復來公復來廬陵彭君栗適知州事問於諸父老諸父老踞而言曰是再造我民者我何可忘吾州古蒙州也唐改立山縣國朝洪武間革為古者巡檢司時草寇竊發民亡者過半比年以來徭徭橫據其地盜日滋而民日孤成化丙申巡撫都御史朱公英督兩廣軍征荔浦

破賊賊懼招之獐老李恭著首遣其子來納款公前以
叅議佐巡撫于戎議城立山立山本州治在桂林平樂
之間為藩腹心今之憂無控暴之地以居民耳州復則
民定尋請於上許之乃營立山是役也公與按察副使
范公鏞都指揮王公輔更主相之明年丁酉州治成方
進軍荔浦時桂山巖恃險後下一軍怒將盡殲之公廉
其脇從者得七百餘人釋遣歸農賊以此傾信招所至
獐獐視我立山咸來此公以好生一念之仁代血戰數

萬之兵也令也吾民之亡者復復而為州昔之戕吾民者今革面為編氓我有農桑我有塾庠生我有養死我有藏公之再造我民也我何可忘於是彭君籍記諸父老之言將碑於學宮以傳而謀於提學時可周先生周先生三致彭君之懇於予俾為之記嗟乎彭君誠不私於公而思惠其州之人士乎請為言之七百死命歸農何致羣兇之納欵州亡州復在民何關於公之一念動於此應於彼默而觀之一生生之機運之無窮無我無

人無古今塞乎天地之間以至禽獸草木昆蟲一體惟
吾命之沛乎盛哉程子謂切脈可以體仁仁人心也充
是心也足以保四海不能充之不足以保妻子可不思
乎聖朝訪古設學立師以教天下師者傳此也學者學
此也由斯道也希賢亦賢希聖亦聖希天亦天立吾誠
以往無不可也此先王之所以為教也舍是而訓詁已
焉漢以來陋也舍是而辭章已焉隋唐以來又陋也舍
是而科第之文已焉唐始濫觴宋不能改而波蕩於元

至今又陋之餘也夫士何學學以變化氣習求至乎聖人而後已也求至乎聖人而後已也而奚陋自待哉孟子曰人皆可以為堯舜周先生師表一方彭君為州守謁文山澤之癯非俗更是以冒言之諸生疑者請質於周先生其必有興起焉者甲倡焉乙和焉俛焉攷攷其傳寢多其化寢博其於公也有光焉則斯文也其猶庶幾泮水之頌歟於是乎書

程鄉縣儒學記

潮之程鄉縣儒學傾圮久矣今按察僉事雩都袁公慶祥處分以新之明年巡按廣東監察御史劉公纓分巡嶺東道僉事王公某往來為之勸借財用或拓地以相其成凡學宮之設有文廟有明倫堂前後位置所具皆同亦程鄉之舊也袁公因地之形勢廣狹而更張之尊左則廟次右為堂皆南面而並峙此則學之大觀也廟主以像世相沿襲有異授之嫌而未詳其所自意者古以尸祭之遺意歟廟前樹杏為壇夾以兩廡戟門之東祠

鄉賢西祠后土泮池在櫺星門之內池之左為宰牲所
堂之東西偏為兩齋為諸生號舍道義門與儒學門相望
東廡之上神庫西齋之上神廚廟與堂之間會饌堂居之
北列齋宇凡此皆出於袁公之規畫授圖於縣令俾成之
總之為屋若干楹自辛亥迄癸丑三易寒暑而後成其形
勝雖極壯麗則亦天下之通制不書可也袁公不以風教
落第二義追惟古先聖王立學教人之本意而作新之袁
公所以望於程鄉則不可不以告也今夫南面而堂一以

奉古之人一以居今之人卑尊並立乎其間此雖因地而
寓形而教未始不存也夫子太極也而人有不具太極而
生者乎語以四科稱羣弟子由漢而來儒者以言語稱者
幾人以政事稱者幾人以文學稱者幾人其間足以方駕
古人而絕塵於當世者亦鮮矣况德行乎顏子超然有見
於卓爾之地所以遨遊乎聖人之方而玄同乎聖人之神
者非可揣摩而得也故其言曰夫子步亦步趨亦趨夫子
奔軼絕塵而回則瞠乎其後微顏子其孰能知之親切

如此夫苟從事於斯雖未即優入顏域亦庶乎閔冉之
間而由求又有不屑為者矣予嘗聞程鄉風俗善多而
惡少孟子曰雞鳴而起孳孳為善者舜之徒也雞鳴而
起孳孳為利者跖之徒也夫三尺童子聞人稱其善則
喜稱其惡則怒是何心哉予老矣彼將有感吾言而興
起者乎縣令辛君竟以袁公之命具其事之本末遣生
員陳珀乞記於予故為之一言葉柏鍾譽楊偉咸以義
官董茲役柏又偕珀來謁文費莫大於納粟指揮陳昂

金定四庫全書
卷一
義官鍾華次之其餘助者又七十餘人名氏多不能具
載宜列之碑陰云

程鄉縣社學記

國朝開設學校自胄監至于府州縣備矣惟鄉之社學
不列於官待有司而後興吉之永豐劉侯彬由戊戌進
士來令程鄉首以教化風俗為事相地邑中得東西員
城得水南村北距城五里得大枯樹南距城八十里各
就其地之便建學宮一所為社學者四學宮之制正北

為正蒙堂東西兩齋相向者無不同也其在東者堂後
考亭之祠前有春浣池詠歸橋皆揭之於亭其在西者
堂南考亭之祠其後退省有軒燕休有所在南北者咸
無焉此小子之學也是學也貧富貴賤才不才共之無
所擇於其人學宮既成侯以諭諸父兄諸父兄咸喜退
各以其子弟來受學則為延師以教之買田租米一百
石以供束脩之需品量所給視所領子弟多寡東西各
四十石水南之受二十石大枯成於諸學之後未有受

馬縣東五六里有地曰周溪山勢自北而來迤邐南下
峯四遶如城遠望不知溪發處但見自出山東北隅
流入溶溶洋洋橫於坡陀之麓上有曲池狀如半月侯
顧而樂之又愛溪之名尋即其地構堂於曲池之上最
高處圖太極圖於北壁前作講堂左右為樓居樓外鑿
二石井泉甘而冽謂之天泉井榜其門曰周溪書院周
溪之門少東過雲步橋北折數百步山曰雲洞與太極
堂東西相望因闢地作亭寓之雲谷之號侯政暇輒往

游焉瞻眺徘徊如有求而弗得侯安取於山水若是勤
哉已上諸役及買田之費侯悉以其在官所當得者積
歲成之一不以擾民教諭李君欽訓導陳君祿具圖與
事遣生員鍾宏走白沙屬予記之古者王畿置小學於
辟雍之側其在侯服邦國則列於庠序之右今之郡縣
學古之大學也今之社學猶古之小學也天下風俗美
惡存乎人人之賢否存乎教觀今之風俗則今之人才
可知矣予嘗終夜思之其不及古者有司非與庠序之

設六經之訓固在也以小學言之朱子小學書教之之具也社學教之地也其皆不可無也天下之事無本不立小學學之本也保自然之和禁未萌之欲日就月將以馴致乎大學教之序也然則社學之興在今日正淑人心正風俗扶世教之第一義也胡可少哉胡可少哉侯之心猶未但己也曰我有司也資於何以治資於何以教山名水名我思古人世豈無庶幾者乎於是為之意以感之為之地以處之十數年間東西行過程鄉

者多矣未聞有吟風弄月而來足以副侯之心者侯
豈敢必哉或謂予曰侯來程鄉居幾年寄懷山水之
間不屑屑於簿書侯何心今且去程鄉矣侯其埃溘
斯世將高棲而遠遁乎以是為知侯予蓋不知也併
記於是

重修梧州學記

百粵之區幾千里東望五羊西通八桂蒼梧界其間皆
古之名郡也成化改元都御史韓公始於梧州開設三

府病一學宮之不稱亟選地于州城之南一里許遷焉
弘治丁巳秋鄧公來總督兩廣軍務謂不可以軍旅之
事先俎豆於是因前人之舊規而益修之凡韓公所
欲為而未暇及者至是大備蓋昔之薄者厚之卑者起
之表柱石以壯闕門榜化龍而儕起鳳神廚神庫交映
乎前禮堂膳堂並立于後齋舍廊廡登降階級莫不煥
然一新盛矣哉夫人之去聖人也遠矣其可望以至聖
人者亦在乎修之而已苟能修之無遠不至修之云者

治而去之之謂也去其不如聖人者求其如聖人者今日修之明日修之修之於身修之於家國修之於天下不可一日而不修焉者也明道先生言於朝曰治天下以正風俗得賢才為本彼學政之不修斯道之難立後生無所興起無以成造就之功然則風俗何由而正賢才何自而得耶因時而立教即物以顯義意者督撫所望於蒼梧之士寧不有在於斯乎有開厥先有成厥後喜二美之駢臻超八荒而獨立然後見夫子之門廓然

洞開可望而不可即况於廣大尊嚴端凝灑落默契乎
人心正大之所存與山岳而並峙顯著乎烟霞歲月之
所積與大化而同流不可動搖不可束縛也哉此則病
夫所自勵以佐督府所望於蒼梧之士者也州別駕謝
君湖承督府命董茲役至是訖工復以教授鍾君偕生
員陶荆民來徵記章於督府舊也督府命之義不可辭
於是乎書

龍岡書院記

父兄不以其言為子弟師業修於身子弟習而化之
其為教也不一因其世箕裘異焉耳農商技藝各有教
豈直士哉昔者堯舜禹湯文武周公道大行於天下孔
子不得其位澤不被當世之民於是進七十子之徒於
杏壇而教之擇善力行以底于成德其至也與天地立
心與生民立命與往聖繼絕學與來世開太平若是者
誠孔子之教也大哉教乎今父兄愛其子弟教以六經
誦之也惟恐其言之不熟講之也惟恐其旨之不明似

矣不知其身之所教與七十子之進於聖人同歟否耶
江西撫之樂安有龍岡書院今都御史謝公綬六世祖
均福始建與其弟均壽講學其中福後以宏詞領信州
壽亦舉進士守來陽歲久棟宇就廢公之父某復即其
地而新之既而諸子皆以文章取科第為顯官公謂其
子琪曰書院無田奚以守琪買田百畝擇謹厚者掌之
以供祭祀及束脩之費公巡撫湖廣兩遣使走數千里
至白沙謁文記之且以教其族之人予少無師友學不

得其方汨沒於聲利支離於批糠者蓋久之年幾三十始盡棄
舉子業從吳聘君游然後益歎迷途其未遠覺今是而
昨非取向所汨沒而支離者洗之以長風蕩之以大波
惴惴焉惟恐其苗之復長也坐小廬山十餘年間履跡
不踰于戶闕俛焉孳孳以求少進于古人如七十子之
徒於孔子蓋未始須臾忘也謝氏之先以儒起家傳數
世至公父子兄弟皆能以文章取科第出為當世用肩
摩踵接盛於一門其得於龍岡者不亦多乎雖然父兄

之教子弟之學將不但如是而已也今之學於龍岡者
一短繁課之外未有聞也公能亮予言否耶橫渠先生
語學者必期至於聖人而後已予於謝氏豈敢謂秦無
人

丁知縣廟記

丁侯為縣六年卒于官歷觀我邑令自洪武迄今求丁
侯未有也侯仕不為己恥以俗吏自居始至著禮式一
編擇立鄉老各數人使統之俗淫於侈靡富者殫財貧

者鬻產上無以為教下無以為守俗由是益壞鄉都老
以禮正之每歲按民丁產輸錢謂之均平錢上下交侵
民受其害侯量入為出歲輸以還使民不知有役民甚
賴之時有橫徵虐民侯感者曰守令之政在養民坐視
其困而不救安在其養民也力請罷之雖以此得罪不
恤也侯素性略於承奉而嚴於鬼神灌獻必親執事有
恪春秋之祭肅如也凡祀典所載有功於名教者為立
祭田使人守之其不應祀者毀之至於接人也亦然可

者與之不可者斥之其馭吏也不察察於案牘吏不敢欺其蒞衆也民服其威斷明察奸偽鮮作夫縣令官平刑賞不加於天下而天下治忽由之知遠之近知風之自知微之顯故子嘗謂侯用世才其有所試矣夫豈苟哉侯以任為學政暇必走白沙往迓歲月內不知其幾顧何取於白沙耶甚矣人不可無志也正其誼不謀其利明其道不計其功侯亦無所不願學而切於救民急先務也死之日耕者弔於野行者弔於途有老嫗夜哭於

其廬旦往問之云嫗何哭之哀也曰開歲役且至死者不可作已故侯之為縣多可書其得民之實在節用去之十有二年邑人共立廟於白沙祀之如不得已焉者思侯之功表之非以儆福於神也後來繼令者亦將有感於斯乎侯名積字彥誠成化戊戌進士寧都人

肇慶府城隍廟記

端陽城隍廟在刺史堂之西歲久就弊弘治癸丑冬郡守黃侯撤而新之命生員陳冕來徵記侯豐城人名琥

予曩從吳聘君游往來劔水嘗一宿其家自侯來守端陽三年愈相傾慕安能已於言耶今天下府州縣有城郭溝池有山川社稷有神主之而皆統其祭者謂之城隍神古制也不俟言矣然神之在天下其間以至顯稱者非以其權歟夫聰明正直之謂神威福予奪之謂權人亦神也權之在人猶其在神也此二者有相消長盛衰之理焉人能致一郡之和下無干紀之民無所用權如水旱相仍疫癘間作民日洶洶以干鬼神之譴怒權

之用始不窮矣夫天下未有不須權以治者也神有禍福人有賞罰失於此得於彼神其無以禍福代賞罰哉鬼道顯人道晦古今有識所憂也中庸曰致中和天地位焉萬物育焉說者謂吾之心正天地之心亦正吾之氣順天地之氣亦順焉虜孰能信斯言之不誣也哉侯治端陽民畏而愛之蓋有志者也故專以其大者告之餘皆在所畧

恩平縣學記

恩平古恩州之域國朝置恩平驛隸陽江縣今恩平堡是也堡立於成化之己丑先是西獠入寇景泰天順間剽掠高涼以東亘數百里無完城民爭起從賊遠邇巢壘相望此其地也成化改元聖天子念兩廣夷賊未平命將討之而用其偏師於此既而賊勢復熾當道者以恩平地四達難守簡畀戎邑令鬱林陶侯素有威略至則急擣其巢穴亦既殺其桀黠者遂以其衆還各郡縣且數萬人而慮其向背靡常即一旦復起為患有如前

日充斥其將何以待之此堡所以建也成化丙申左都御史彬陽朱公奉勅總督兩廣軍務既至環胝列郡昔常為賊所破者亟謀所以善其後謂恩平故多虞且其地介數邑之間當東西行之衝送往迎來民勛於道路者無虛日不如以堡為邑便會我陶侯亦以邊功累陞按察副使奉璽書專經畧是方公於是俾侯成之區畫既定悉以上聞凡割陽江新會新興三縣人戶三千戶糧一萬石縣仍驛名城以堡建無所改於其舊城之中

為治戎之所東則縣治西則學宮既成諸士子遠近雲
集學舍不能容誦絃之聲盈耳過者歎曰美哉洋洋乎
昔為盜賊之壘今為詩書之府誰之力歟邑令翁君以
書屬予記其事而於學宮尤惓惓焉甚矣翁君之明而
保民也自有邊患以來狼吞虎噬以殘民之生人所知
也湯沸火烈以賊民之性人未必知也顛沛流離死生
利害怵于前而父子失其親兄弟失其愛鼓之以鬪爭
之風置之於水火之地則五品之倫五常之性與生俱

滅誠不可不懼也衛靈公問軍旅之事孔子辭以未學
曰俎豆之事則嘗聞之矣自今觀之昔者軍旅之興雖
以拯民亦以弊民弊民之政孔子所不忍言豈得已哉
今地方寧謐文教聿新俎豆之事安可一日而不講耶
邑長俎豆其政而忠信發之學官俎豆其教而忠信導
之諸士子俎豆其志而忠信體之習端而俗正教立而
風行民樂生而好亂者息士有恥而慕義者衆則刑罰
可省禮義可興囹圄可空干戈可戢守令之責盡矣而

君之志寧不亦樂於斯乎予不文謹具其事始末與其
所當先者以復君碑於學宮俾來者有考焉君名儼甫
陽人

新遷電白縣儒學記

邑何遷遷避寇也先是電白在高州府治之東按察僉
事陶公提兵過之顧謂其守宰曰形勝不足以守邑宜
遷遷必於神電衛焉其地廣可以容其城固可以守去
危即安民之賴也舍茲弗圖志不在民也知府孔侯鏞

以公之說聞於上遂遷焉時成化戊子歲也學宮在縣
治東南當是時寇賊未殄草屋一間奉大成木主而已
歲丙申公以秩滿遷副使奉璽書專經略是方每一過
之未嘗不瞻顧徘徊以學校之興廢為己責而歎其力
之未遑也明年寇乃克平是方之民寄命於盜賊之水
火者幾二十年至是始遑公暇時巡省諸郡縣俾勞來
匡直咸盡其方越二載而民之病者蘇仆者起矣公顧
力可及以狀請於欽差總督兩廣軍務右都御史朱公

首創學宮次及諸役許之於是闢土為基度財為用而屬是役於某官某使督之以己亥三月某甲子始事越明年八月某甲子而舍葺焉宮宇峩兀門觀軒敞神像清嚴器用具足繚之以宮牆飾之以丹漆誠壯誠麗遂為一郡學校之冠其他若縣治若城隍社廟若潘泉行司以及郵傳邸舍橋梁道路一一區畫成之營材於山民不知勞為陶於野財不妄費而皆以一當百以百當萬故役之煩者化而為簡難者化而為易公勲庸著於

武事不可勝計世稱公通變無方亦焉往而非是也哉
韓君某來守是郡既至睹衆美之具成乃嘆曰博哉功
乎歷審其為之先後又歎曰公留意學校功先庶務其
重如是乎乃具書弊遣其屬蔡鍾英如白沙請予記之
辭不獲推古學校之意而言曰學校一也所以有古今
之異者存乎人孔子曰古之學者為己今之學者為人
程子曰古之仕者為人今之仕者為己夫學以求仕之
所施仕以明學之所蘊如表裏形影然畢變稷契伊傅

周召其載於典謨訓誥仕者之所施也有為己之心乎
顏曾思孟周程張朱其傳於著述文字學者之所蘊也
有為人之心乎諸君子顯晦不同易地而處之有不相
能者乎自古有國家者未始不以興學育才為務然自
漢而下求諸學校之所得名世者幾人有不由庠序而
興者乎是故學校之設其重在於得人學之道其要在
於為己古之名世者舍是無以成德甚矣斯學之不講
於世也久矣公所望於學校意者其在此乎公名魯字

自強廣右之鬱林人也始恩授吾邑丞公之先公成浙江按察副使死事武義云

新會縣輔城記

吾邑輔城周遭六七里高若干尺東南際水西北鑿城下為池旁植刺竹施蒺藜其中為營門以守嘗記往年西寇之來憑陵高涼以東破關襲城勢如建瓴至此則截然而止如虹霓之收急雨由是而吾民之丘隴以完室家以安雞犬以寧倉箱以盈燕有歲時樂有賓客至

於今各得其所者則誰之賜乎始者吾謂陶公曰孔子
曰言忠信行篤敬雖蠻貊之邦行矣以此而盡吾心則
庶政無不修用人無不當理財無不富治兵無不强不
知乎此而欲徒恃其末蓋後世以法劫制天下區區之
為也公之功固大矣而聖人之道非耶公曰不然行聖
人之道有二術內之曰心外之曰權無其心則權為挾
私妄作矣無其權雖有其心將安施哉今夫用行伍之
人取其長不責其備宥其過以圖其功可也或者過於

求實一疵不貸而用舍乖張矣今夫理財於擾攘之秋
非常賦剋取之民故推牛灑酒豐犒厚享非以醉飽為
德所以作士氣也顧小利而忘其大體者則朝夕與小
吏計牙籌算贏餘矣今夫治兵於閫外號令則大將主
之而吾每以偏師從事况夫深山窮谷民獠雜居善惡
同狀生殺在前而節制不一沮我者惟以殺無辜為言
矣此事之所以難行而心之所以不孚於人也烏虜兵
凶器也豈得已哉公從事于茲餘二十年吾民之老者

以死少者以壯事功在邊隅日遠日忘蓋不可以無紀而垂告於將來今西師戒嚴盜賊塞路吾欲於知力之外而網維乎是則孰與語哉

雲潭記

白沙之西山則圭峯也東北連數峯最勝者為綠護屏屏之南有潭淵然曰聖池下蟠蛟龍龍嘘氣成雲變化萬狀里生周鎬偕其季京來謁予白沙時維仲春風日晴美予與二子攜酒飲于西山之麓班荆而坐仰而四顧

有雲起綠護屏炫爛如丹青郁紛若祥瑞予顧謂二子
曰是聖池之雲也偉哉觀乎二子愀然正襟侍側曰是
吾先子之志也先子居龍溪垂五十年無他嗜好惟喜
為雲潭之觀故先子之號曰雲潭予曰嘻有是哉若先
子我舊不幸早世不及見若兄弟長也若豈盡聞之乎
居吾語汝夫潭取其潔也雲取其變也潔者其本乎變
者其用乎二子齊應曰然予曰未也野馬也塵埃也雲
也是氣也而雲以蘇枯澤物為功易曰密雲不雨自我

西郊是也水以動為用而潭以靜為用物之至者妍亦
妍媸亦媸因物賦形潭何容心焉是之取爾二子喜相
謂曰先生命我矣於是復進而告之曰天地間一氣而
已誠信相感其變無窮人自少而壯自壯而老其歡悲
得喪出處語默之變亦若是而已孰能久而不變哉變
之未形也以為不變既形也而謂之變非知變者也夫
變也者日夜相代乎前雖一息變也況於冬夏乎生於
一息成於冬夏者也夫氣上蒸為水下注為潭氣水之

未變者也一為雲一為潭變之不一而成形也其必有將然而未形者乎默而識之可與論易矣二子於是起而再拜乞書為雲潭記

潘氏祠堂記

一善可書也吾書之吾畏多言也信多乎哉不多也傷俗之益偷吾無位也言不能化而入惡在乎多言也善者吾斯進之而已矣潘某氏者南海之著姓老而無子曰吾無繼可也兄弟之子猶子也同吾胞者幾人繼其

世者若干人可以執籩豆可以守宗廟可以事繼述而傳無窮矣吾何憂吾無繼可也以其所有者歸之祠以卒噫茲可憫也已若是者其亦足與乎其無足與也堯之時比屋可封降自後世不以善而以利父子也而不用情兄弟也而闕于牆婦姑勃篋朋友按劍者皆是也夫恒人之情莫甚於顧其私而不忘其後某也致孝乎祖禰委祝乎兄弟其生也若遺其死也若虛非求馬於唐肆者歟未可知也伯氏某成某之志以其地三畝構

祠屋三間以奉四代神主其田若干畝以供常祀詩曰
兄及弟矣式相好矣其斯之謂歟某之從子上舍生漢
也有一日之雅於白沙來請記其事予不能辭也於是
乎書

增城劉氏祠堂記

古聖賢以民德歸厚必曰追遠又曰宗廟之禮所以序
昭穆也序爵所以辨貴賤也序事所以辨賢也旅酬下
為上所以逮賤也燕毛所以序齒也廟始遷之祖而祭

之古之制不可考已君子隨時變易以不犯其分而得其心蓋人情出於天理之不容已者夫何嫌歟古之仕者世繼死者有廟生者有宗恩相慶而死相弔百世不相忘世降俗偷蓋有不然者矣邸第之雄田園之美肥甘豔麗飽妻子祖考所棲與蟲鼠為伍殘膏賸馥何有及之其鄙陋污穢可勝道哉中古之王天下者嘗為卿大夫作家廟以愧之卿大夫猶然况士庶乎先世之流風餘韻至此幾絕以吾之一身散而為百體拔其一

毛而心為之痛是孰使之然哉且人之賦於天命者有
賢不肖貧賤富貴之差吾之所以仁愛者未能皆然貧
賤不薄於骨肉富貴不加於父兄宗族者誰乎故曰收
合人心必原於廟宋之惠州守劉仲明自南雄遷增城
有劉氏自仲明始也傳至今太學生璫十有二世其先
世嘗廟而祀之不遷又置田以供祀事以圖無窮頽而
復起者再矣父有積薪子不斫而爨之世豈少哉璫自
言系本元城世有衣冠曰緣者璫之父也曰漢曰孔祥

金... 卷一
者獻之諸父行也一念追遠之同天順甲申始拓廟旁
之地而新之廟成而諸父亡矣成化庚子獻之兄瓚又
率其族兄弟而增修之前堂後院棟宇層起煥如也四
垣竹樹周遭過其門者咸以是稱焉於前有光於後有
繼於士大夫其無愧哉今年秋獻因林時嘉再至白沙
子示之詩云一雨變新涼炎埃洗除盡廬山昨夜燈已
照劉宗信故為之記以詔其後人

永慕堂記

予幼時讀孟子人少則慕父母知好色則慕少艾有妻
子則慕妻子仕則慕君不得於君則熱中大孝終身慕
父母五十而慕者予於大舜見之矣竊疑孟子之言抑
揚太過愛親人子之至情也不待教而能不因物而遷
人之異於聖人也豈相懸絕若是耶比弱冠求友於四
方多識當世之士擇其賢者能者而師之其不可者而
改諸內外輕重之間槩以孟子之論其役志於功名其
循情於妻子其思慕其親其不以皓首而媿垂髫者希

矣然後信孟子之知道不苟於言也成化甲辰江陰李君昆以侍御史被命清理軍伍于兩廣始過白沙進拜老母于堂予雅未識君之色而訝其憂之餘耳君之孝而訝其哀之餘意風木其心者恒怵惕於見人之親歟君曰然少留君坐語之以卅角所疑於孟子以壯而後信其言不予欺因與君論交焉它日再過白沙索書永慕堂扁予申以孟子之言曰人各有所慕仁者慕親義者慕君士慕學農慕稼穡百工慕能商賈慕貿遷無無

慕者慕之至死而勿替乃至形乎動靜接乎夢寐通乎
幽明皆性之所發而為情有莫知其然而然者此之永
慕是也夫孰得而奪之彼幼而慕壯而衰老而遂忘慕
之不至而遷於物是之謂情其性非知內外輕重之別
者也夫忠孝之推也不孝於親而忠於君古未之有也
御史諫官也繩人以身者也名堂之義其以忠孝示天
下乎君聞之悅命左右滌硯乞書為永慕堂記

潮州三利溪記

古今學者不同孔子以兩言斷之曰古之學者為己今之學者為人古今仕者不同程子以兩言斷之曰古之仕者為人今之仕者為己古之人人也今之人人也一也判而兩之其不可同者如陰陽晝夜則有其故矣聖賢之所以示人也知微之顯知顯之微學為己也其仕也為人學為人也其仕也為己斷不疑矣今守令稱賢於一邦利澤及於民民愛而樂之問於我嶺南十郡之內吾知其人者周潮州也潮海郡也東南距大海望之渺

漫接天習水者乘長風駕大舶出沒巨浪中小不支則有覆溺之患每歲漕運潮人共苦之潮州來守郡問潮父老所以便民者父老曰其惟三利溪乎潮五屬邑其三在郡治西南形若鼎立廣袤千里水曲折行其中而民共賴之者三利溪也是溪之長百一十五里東抵韓江西流入于港正統間湮於大水潮州濬而通之水由故道行東西注會同於海慮其冬旱而且涸也鑿郡城南溝引韓江水注于溪甃石為闕時而開閉之凡役民于

畚鍤卑之為溪也高之為闕也僅一月而成農夫利于田商賈利于行漕運者不之海而之溪辭白浪於滄溟謝長風於大舶於是潮之士夫與其父老拜郡門謝曰利吾潮者吾父母也吾子孫敢忘之由是觀之謂周潮州仕而為人也非歟吏於潮者多矣其有功而民思慕之唐莫若韓愈入國朝來莫若王源驅冥頑之鱷造廣濟之梁其事顯於為人不可誣矣今潮州以三利溪配之輝映後先稱賢於一邦也宜哉夫短於取名而長於

求志薄於傲福而厚於得民非以奉身而燕及笄綈陋
於希世而尚友千古黃涪翁之所稱者非濂溪先生歟
潮州遺予書曰我故舂陵族也潮州之舉進士有聲郎
秋官有聲守郡有聲其尚不忝其世也哉吾嘗贈之詩
云楚中有孤鳳高舉凌穹蒼借問歸何時聖人在黃唐
望之久不至歲晏涕淋浪九苞有遺種不覺羽翼長三
年集南海使我今不忘逍棲桐枝長飲甘露漿吾生
濂溪數百年之後思濂溪而不可得見見其族之雲仍

若此者殆可與言矣然則區區所愛慕於周潮州者一
關三利溪而已耶潮人相與立碑頌潮州之功遣生員
趙日新來請文子以其事并詩記之俾潮之人知仕而
為人者有功不可忘而潮州之進未艾也潮州名鵬字

萬里道州之永明縣人

先生文既成每詢之潮人多言三利之利無實因作一詩以代

跋云欲寫平生不可心孤燈挑盡幾沈吟文章信史知誰是且博人間潤筆金意欲示後人失於審也其後王侍御哲至潮見之歎曰君子可欺以其方噫斯言得之矣弘治甲子秋門人張詡識

尋樂齋記

五年伍光宇始構亭于南山之巖以坐明年復於吾居
第之左結草屋三間與亭往來又明年而光宇死矣草
屋之成光宇齋戒沐浴焚香更衣危坐厥明請余問曰
雲不自知其力之不足妄意古聖賢人以為師今年且
邁矣不得其門而入不知其所謂樂尋常間自覺惟坐
為樂耳每每讀書言愈多而心愈用用不如不用之為
愈也蓋用則勞勞則不樂不樂則置之矣夫書者聖賢
垂世立教之所寓也奚宜廢將其所以樂者非歟願先

生之教之也余復之曰大哉吾子之問也顧余何足以知之雖然有一說願吾子之思之也周子程子大賢也其授受之旨曰尋仲尼顏子樂處所樂何事當是時也弟子不問師亦不言其去仲尼顏子之世千幾百年今去周子程子又幾百年嗚呼果孰從而求之仲尼飲水曲肱顏子簞瓢陋巷不改其樂將求之曲肱飲水耶求之陋巷耶抑無事乎曲肱陋巷而有其樂耶吾子其亦慎求之母惑於坐忘也聖賢垂世立教之所寓者書

也用而不用者心也心不可用書亦不可廢其為之有道乎得其道則交助失其道則交病願吾子之終思之也仲尼顏子之樂此心也周子程子此心也吾子亦此心也得其心樂不遠矣願吾子之終思之也語已光宇整步而出克然若有得者歸揭其榜曰尋樂齋云

風木圖記

莆之李侯某由進士官戶曹員外郎出為廣東按察僉事每出行部至新會輒一過病夫陳某白沙坐小廬山

精舍半餉始至攜所得誌銘文并挽詩一大帙來授而
讀之三斂衽先處士默菴先生與林夫人之賢皆可考
而知矣尋以風木圖請記夫孝子之事其親視於無形
聽於無聲致愛則存致慤則著著存不忘乎心奚存歿
間哉吾聞之曾子再仕而心再化曰吾及親仕三釜而
心樂後仕三千鍾不洎吾心悲弟子問於仲尼曰若參
者可謂無所縣其罪乎曰既已縣矣夫無所縣者可以
有哀乎彼視三釜三千鍾如鸛雀蛟虵相過乎前也今

夫祿之弗逮養曾子悲之侯亦悲之侯之心曾子之心也若曾子可謂盡思矣美事於圖乃若孔子則以為子之養其親期於適焉耳苟至乎適雖聖人不能以有加也遑問其他其足於內者無所待乎外性於天者無所事乎人又非但事親一事為然也一以貫之其所稱孝非常所稱常所稱者豐其養厚其葬生之封死之贈而已耳嗟夫今之士夫異於古之士夫也其所稱孝率以是為至矣吾恐聖賢之意不明於後世也既撫圖而悲

復引其意謂侯曰侯死事盡思無負於曾子矣亦知曾子所以顯其親於無窮者何如哉孝經曰立身行道揚名於後世以顯父母孝之終也侯念之侯念之是為記

處素記

一夫頎然始弱冠為生員事進取不偶退耕于野作室三間榜兩處素字于楣曰吾不了其義當否吾以問白沙子白沙子聞之絕倒間數日抵一卷請曰為我記處素白沙子命出硯研墨汁相向詰之曰夫記紀實也為

我具狀吾為女記即應曰母苦我人呼我秀才我即不應謂我處素我即應之但子為我記足矣吾知其狀云何兩手捧硯躡席揚首進愈恭白沙子不能却墨其卷歸之

慈元廟記

世道升降人有任其責者君臣是也予少讀宋史惜宋之君臣當其盛時無精一學問以誠其身無先王政教以新天下化本不立時措莫知雖有程明道兄弟不見

用於時迹其所為高不過漢唐之間仰視三代以前師
傳一尊而王業盛歛畝既出而世道亨之君臣何如也
南渡之後惜其君非撥亂反正之主雖有其臣任之弗
專邪議得以間之大志弱而易撓大義隱而弗彰量敵
玩讐國計日非往往坐失機會卒不能成恢復之功至
於善惡不分用捨倒置刑賞失當怨憤生禍和議成而
兵益衰歲幣多而民愈困如久病之人氣息奄奄以及
度宗之世則不復惜為之掩卷出涕不忍復觀之矣孔

子曰人之生也直罔之生也幸而免劉文靖廣之以詩
曰王綱一紊國風沈人道方乖鬼境侵生理本直宜細
玩著龜萬古在人心噫斯言也判善惡於一言決興亡
於萬代其天下國家治亂之符驗歟宋室播遷慈元殿
創于邑之厓山宋亡之日陸丞相負少帝赴水死矣元
師退張太傅復至厓山遇慈元后問帝所在慟哭曰吾
忍死萬里間闕至此正為趙氏一塊肉耳今無望矣投
波而死是可哀也厓山近有大忠廟以祀文相國陸丞

相張太傅弘治辛亥冬十月今戶部侍郎前廣東右布政華容劉公大夏行部至邑與予泛舟至屋門弔慈元故址始議立祠於大忠之上邑著姓趙思仁請具土木公許之予贊其決曰祠成當為公記之未幾公去為都御史修理黃河委其事府通判顧君叔龍甲寅冬祠成是役也一朝而集制命不由於有司所以立大闢愧頽俗而輔名教人心之所不容已也碑於祠中使來者有所觀感弘治己未夏予病小愈尚未堪筆硯以有督府

鄧先生之命念慈元落落東山作祠之意久未聞於天下力疾書之愧其不能工也

夢記

庚寅秋月距予自京師歸適踰一載是夕天氣稍涼予讀易白沙之東房既倦而卧夢與應魁殿元克恭黃門同行一童子前導不識者一人次之次克恭次余應魁途遇泥潦予呼童子取行具童子不應余因曰越人歌之楚人應之應魁屢歎不置克恭顧余作愁狀其不識

一人者漠然若無所聞焉既寤測其意曰越與楚風氣
不同人聲隨而異必不能相通而相好使越人歌之楚
人聽之亦猶使楚人歌之越人聽之也孰若使越人歌
之越人自聽之楚人歌之楚人自聽之其音習於其耳
其言感於其心奚不相說之有是故越不可為楚楚亦
不可為越越與楚不相能非有生之初習使然耳習之
久殆與性成夫苟欲變之非百倍其功持之以久不可
使化而入今若以為越者一人驟而號於楚地曰去而

為楚者以從我楚得不羣怒而逐之乎然則如何曰
守其為越者無遽責楚以必同庶乎其免矣

又

三月二十七日碧玉樓午睡夢出貞節門外大水一老
人抱衣浣於前歌曰法好人莫傳衣好人莫穿良久
又歌曰西子蒙不潔揜鼻過者疾趨而爭先雖有惡
人齋戒沐浴被服明鮮以祀上帝執侍周旋與世駢
肩吁是何夢即將有應于後早為之兆耶抑夢幻虛

自
卷一
無同異端之說從而稽之因妄求妄不可耶姑記於此
以俟明者決焉

補遺

論前輩言銖視軒冕塵視金玉

上

道至大天地亦至大天地與道若可相侔矣然以天地
而視道則道為天地之本以道視天地則天地者太倉
之一粟滄海之一勺耳曾足與道侔哉天地之大不得

與道侔故至大者道而已而君子得之一身之微其所
得者富貴貧賤死生禍福曾足以為君子所得乎君子
之所得者有如此則天地之始吾之始也而吾之道無
所增天地之終吾之終也而吾之道無所損天地之大
且不我逃而我不增損則舉天地間物既歸於我而不
足增損於我矣天下之物盡在我而不足以增損我故
卒然遇之而不驚無故失之而不介舜禹之有天下而
不與烈風雷雨而弗迷尚何銖軒冕塵金玉之足言哉

然非知之真存之實者與語此反感惑則徒為狂妄耳

中

天下事物雜然前陳事之非我所自出物之非我所
素有卒然舉而加諸我不屑者視之初若與我不相涉
則厭薄之心生矣然事必有所不能已物必有所不能
無求於吾前矣得謂與我不相涉耶夫子謂不義而富
且貴於我如浮雲謂薄不義也非薄富貴也孟子謂
舜視棄天下如敝屣亦謂重愛親也非謂輕天下也

君子一心萬理完具事物雖多莫非在我此身一到精神具隨得吾得而得之耳失吾得而失之耳厭薄之心胡自而生哉巢父不能容一瓢嚴陵不能禮漢光此瓢此禮天下之理所不能無君子之心所不能已使二人之心果完具亦焉得而忽之也若曰物吾知其為物耳事吾知其為事耳勉焉舉吾之身以從之初若與我不相涉比之醫家謂之不仁昔人之言曰銖視軒冕塵視金玉是心也君子何自得之哉然非其人與語此反惑

惑則累之矣或應曰是非所謂君子之心也君子之辨也曰然然無君子之心徒有輕重之辨非道也

下

或曰道可狀乎曰不可此理之妙不容言道至於可言則已涉乎麤迹矣何以知之曰以吾知之吾或有得焉心得而存之口不可得而言之比試言之則已非吾所存矣故凡有得而可言皆不足以得言曰道不可以言狀亦可以物乎曰不可物囿於形道通於物有目者不

得見也何以言之曰天得之為天地得之為地人得之
為人狀之以天則遺地狀之以地則遺人物不足狀也
曰道終不可狀歟曰有其方則可舉一隅而括其三隅
狀道之方也據一隅而反其三隅按狀之術也然狀道
之方非難按狀之術實難人有不知彈告之曰彈之形
如弓而以竹為弦使其知弓則可按也不知此道之大
告之曰道大也天小也軒冕金玉又小則能按而不惑
者鮮矣愚故曰道不可狀為難其人也

安土敦乎仁

易上繫曰安土敦乎仁予曰寓于此樂于此身于此聚精會神于此而不容惑忽是謂之曰君子安土敦乎仁也比觀泰之序卦曰履而泰然后安又曰履得其所則舒泰泰則安矣是泰而后可安也夫泰通也泰然后安者通于此然后安于此也然九二曰包荒用馮河是何方泰而憂念即興也九三曰艱貞无咎則君子於是時愈益恐恐然如禍之至矣是則君子之安于其所豈直

泰然而無所事哉蓋將兢兢業業惟恐一息之或間一念之或差而不敢以自暇矣有於予心符或曰君子不己勞乎應曰乾之象曰天行健天之循環不息者健而已君子執虛如執盈入虛如有人未嘗少懈者剛而已天豈勞哉君子何為不暇乎

無後

君子一心足以開萬世小人百感足以喪邦家何者心存與不存也夫此心存則一一則誠不存則惑惑則偽

所以開萬世喪邦家者不在多誠偽之間而足耳夫天地之大萬物之富何以為之也一誠所為也蓋有此誠斯有此物則有此物必有此誠則誠在人何所具於一心耳心之所有者此誠而為天地者此誠也天地之大此誠且可為而君子存之則何萬世之不足開哉作俑之人既惑而喪其誠矣夫既無其誠而何以有後邪

仁術

天道至無心比其著於兩間者千怪萬狀不復有可及

至巧矣然皆一元之所為聖道至無意比其形于功業者神妙莫測不復有可加亦至巧矣然皆一心之所致心乎其此一元之所舍乎昔周公扶王室者也桓文亦扶王室也然周公身致太平延被後世桓文戰爭不息禍藏于身者桓文用意周公用心也是則至拙莫如意而至巧者莫踰于心矣孟氏學聖人也齊王不忍見一牛之死不有孟氏不知其巧也蓋齊王之心即聖人之心聖人知是心之不可害故設禮以預養之以為見其

生而遂見其死聞其聲而遂食其肉則害是心莫甚焉
故遠庖廚也夫庖廚之禮至重不可廢此心之仁至大
不可害君子因是心因制是禮則二者兩全矣巧莫過
焉齊王之心一發契乎禮齊王非熟乎禮也心之巧同
也聖人因民害而逆之四裔之民奚罪焉亦曰戮之則
闕有之遺害故聖人之仁有權焉使之遠禦魍魎則
害去而惡亦不得施矣夫人情之欲在于生聖人即與
之生人情之惡在于死聖人不與之死惡衆人所惡也

聖人即迸除裔夷惡難施也聖人以投惡聖人一舉而
迭中聖人未嘗巧也此心之仁自巧也而聖人用之故
天下有意于巧者皆不得廁其間矣周公一金滕大發
寤時主以後世事觀至巧矣周公豈有意耶亦任心耳



陳白沙集卷一